

PAULO TỸ ÇARTA HAN: TIMÓTEO MỸ CARTA Û

¹ Paulo tỹ rá vễ. Topẽ ne inh fêg', isỹ tỹ *Jesus Cristo apóstolo* jẽ jé. Inh mỹ tóg tó, isỹ vễnh kar mỹ ẽg tỹ *Jesus Cristo* tugrĩn rĩnrĩn nỹtĩnh ke tag tó jé. Topẽ tỹ ẽg mỹ nén han sór mũn hã vễ.

² Isỹ inh kósin tỹ *Timóteo* mỹ rán hã vễ, isỹ ù to há tãvĩ nĩ ẽn mỹ. Ẽg jóg tỹ Topẽ mỹ sóg to vĩ tĩ, ti tỹ ã tar han jé, ti tỹ ã jagãgtãn jé, ti tỹ ã krĩ kuprãg jé ke gé.

Topẽ mỹ vĩ há han

³ Topẽ mỹ sóg vĩ há han tĩ. Ti hã mỹ sóg rãnrãj tĩ, inh jógjóg ve ag ri kén. To kygnẽ sór vãnh inh nĩgtĩ.

Ã tó sóg tĩ, sỹ Topẽ mré vémén kỹ. To krónh ke tũ inh nĩgtĩ, kurã kar ki. ⁴ Isĩg kỹ ã tóg fỹ ja nĩ. Hã mĩ sóg ẽkrég tĩ. Hã kỹ sóg ã ve sór tãvĩ nĩ, inh fe tỹ mrin ke jé. ⁵ *Jesus* ki rã há han kỹ ã tóg nĩ, ã vóvó tỹ *Lóide* fi ri ke, ã mỹnh tỹ *Eunice* fi ri ke. Ki kanhró sóg nĩ.

⁶ Hã kỹ sóg ã jyvẽn sór mũ. Topẽ vĩ ã mỹ vễnh rãnrãj nĩm, isỹ inh nĩgé tỹ ã kri fi ja nĩn kỹ. Ẽn to tar nĩm nĩ. ⁷ Topẽ vĩ ẽg mỹ ti kuprĩg jẽnẽ, ẽg kanẽ jur tũ nĩ jé, ẽg tar nỹtĩ jé, ẽg tỹ jagnẽ to há nỹtĩ jé, ẽg tỹ vễso jykrén jé.

⁸ Hã kỹ ẽg *Senhor* to mỹ'ãg tũg nĩ. Ti kãmén nĩ. Kỹ inh kãmén nĩ gé, isỹ ti tugnĩn se kỹ jẽ tag ti. Kỹ ã tỹ ti tugrĩn vễsỹrénh ke tag kamẽg tũg nĩ gé, inh mré. Topẽ vĩ to ẽg vễsỹrénh tĩ. Hã ra Topẽ tóg to ẽg tar han tĩ. ⁹ Ti hã ne ẽg kren han'. Ti hã ne ẽg kuprẽg',

ẽg tỹ tỹ ti tũ nỹtĩ jé. Ẽg tỹ vėsóg ki to vāsān pijé!. Ti há ne to jykrén!. Kỹ tóg ẽg jagāgtān kỹ ẽg kuprẽg, *Jesus Cristo* t McGrĩn. Nén kar han ke to há tóg tag to jykrén ja nĩgtĩ. ¹⁰ Kỹ tóg ũri há ẽg mỹ tó, ti tỹ ẽg kren han tĩ tỹ *Jesus Cristo* jēnēn kỹ. Ti há vỹ ẽg ter pē han ke tag tỹ tũ' hé. Kỹ tóg ẽg rĩnrĩr han mũ sir, ẽg tỹ ẽg rĩr krỹg ja tũ ve jé sir, ẽg tỹ ti vĩ sér kri fi kỹ. ¹¹ Kỹ tóg inh mỹ: “vēnh kar mỹ inh vĩ tónh tĩg,” he ja nĩ gé, sỹ tỹ ti *apóstolo* jē jé, sỹ ti vĩ tỹ vēnh kar kanhrān jé. ¹² Há kỹ sóg se kỹ jē ha. Há ra sóg mỹ'āg ke tũ nĩ. Ti ki rā kỹ sóg jē ha. Ti ki kanhró sóg nĩ. Nén ũ kar to tóg tar nĩ. Há kỹ tóg inh ki rĩr há han ki kanhró nĩ gé, sỹ ti mỹ vēnh fēg kỹ, isỹ kurā tỹ ẽgno pétēm há han jé.

¹³ Isỹ nén tỹ ā kanhrān ja ẽn kā jatu tũg nĩ. Vēnh vĩ há vē, sỹ ā mỹ nén tó ja ti. Tag ki króm kỹ inh ri kén kāmén nĩ. Ti ki rā to tar nĩm nĩ, vēnh kar to há nĩm nĩ gé. *Jesus Cristo* tỹ nén han ja ẽn ri ke han nĩ. ¹⁴ Ti tỹ ā mỹ vēnh rānrāj nĩm ja ẽn ki rĩr há han nĩ, ũ tỹ Topē vĩ tỹ ũ han tũ nĩ jé. Topē kuprĩg vỹ ẽg kā ki ẽmā nĩ. Ẽn vỹ ā tar han ke mũ, ā tỹ ti vĩ tó há han ke to.

¹⁵ Ha vé, ga tỹ *Ásia* tá ke kar ag vỹ isovānh kān, *Fígelo* ke gé, *Hermógenes* ke gé. Tag mẽ ā hỹn huri. ¹⁶ Topē mỹ sóg to vĩ tĩ, ti tỹ *Onesíforo* mré ke fag jagāgtān jé, ũn tũg mũ ẽn ti. Iso há tāvĩ ja ti nĩgtĩ. Iso mỹ'āg ja tũ ti nĩgtĩ, ise kỹ jē há ra. ¹⁷ Ti tỹ ẽmā tỹ *Roma* tag ki jun kỹ tóg inh jāvānh tāvĩ han ja nĩ. Kỹ tóg kejēn inh ve ja nĩ. ¹⁸ *Éfeso* tá tóg inh ki rĩr há han ja nĩgtĩ gé. Kỹ ẽg *Senhor* hỹn ti jagāgtān ke mũ, ti tỹ kurā tỹ ẽgno kā ti kren han jé. Kỹ tóg inh mỹ sér tĩnh mũ.

2

Ĕg vāsān ke

¹ Inh kósin', *Jesus Cristo* ne ã tar han ke mũ', kŷ krónh ke tũg nĩ. ² Inh vĩ mẽ ã, sŷ ùn e ag kanhrān kŷ. Tag tóm nĩ gé, inh kóm, ù tŷ krónh ke tũ ag mẽ.

³ Ĕg tŷ *Jesus* tigrĩn vēsŷrénh ke to tar nĩm nĩ inh mré, *Timóteo*'. *Jesus Cristo soldado* ri ke ěg nŷtĩ.

⁴ *Soldado* jykre tag to jykrén nĩ. Ag pijé vyr mẽ jykrén tĩ'. Ag pã'i vĩ ki hã han ag tóg tĩ, ti tŷ ag to há nĩ jé. Hã kŷ ag tóg vyr mẽ gŷj ve sór tũ nĩgtĩ.

⁵ Kŷ ù tŷ *corrida* han mũ ag jykre to jykrén nĩ gé. *Corrida* to vējykre ěn hã han ag tĩ, ag tŷ gŷjŷ he jé. Ag ri ke han nĩ, *Timóteo*'.

⁶ Kŷ ěpŷ ki rĩr tĩ ag vŷ rãnrãj mág han tĩ gé, hã kŷ ag tóg krãn kŷ ti kanē ko tĩ. Ag ri kén ã tóg venh ke mũ gé, ã tŷ nén ve sór mũ ti, ã rãnrãj to, ha vem nĩ.

⁷ Tag to jykrén há han nĩ, sŷ ã mẽ tó mũ tag to. Kŷ ěg *Senhor* vŷ ã tŷ to jykrén há tãvĩ han ke mũ sir. ⁸ *Jesus Cristo* mũ ěkrén nĩ. Ti ter kar kŷ tóg rĩr mãn. Ti jójóg ve vŷ tŷ *Davi* ja nĩgtĩ. Hã tó sóg tĩ, ti kãmén kŷ. ⁹ Hã kŷ sóg se kŷ jē, *ferro* tŷ mẽr. “Ti hŷn tŷ ùn jykre pãno nĩ,” he ag tóg tĩ iso. Hã kŷ ag tóg *ferro* tŷ isé. Hã ra Topē vĩ pijé se kŷ nĩ nĩ'. Tã mũ tóg tĩ ha. ¹⁰ Hã kŷ sóg ise kŷ jē hã ra ti to tar nĩ, Topē tŷ ùn kuprēg mũ ag jagfy, ag krenkren jé, ag tŷ *Jesus Cristo* ki ge tigrĩn kanhkã tá junjun jé.

¹¹ Vēnh vĩ há vē, tag ti, ha mẽ: ěg tŷ ti tigrĩn kãgter mũ ra ěg tóg ti mré rĩnrĩr mãn ke mũ gé. ¹² Ĕg tŷ ti tigrĩn nén ù jagy kar to tar nŷtĩn kŷ ěg tóg ti mré tŷ ùn mág nŷtĩnh ke mũ gé. Ĕg tŷ ti tovãnh kŷ tóg ěg tovãnh ke mũ gé. ¹³ Ĕg tŷ ti to krónh ke tĩ ra tóg ěg

to krónh kenh ke tũ nĩ jãvo. Ti pijé ón tĩ', hã kũ tóg ãg to krónh kenh ke tũ nĩ.

Topẽ rãnrãj han há han ke

¹⁴ Tag tó m nĩ, vẽn kar mĩ. Tỹ ag jyvẽn nĩ, kũ ag jyvẽn tar han nĩ gé. Topẽ vỹ ã vỹ mẽn mũ. Ag mỹ: “ẽg kato tẽ ag vỹ kafã sór tũg nĩ,” hem nĩ. “Jagnẽ vỹ kafã pijé ãg tar han mũ'. Ũ tỹ tag mẽ kũ tóg krónh ke sór mũ,” hem nĩ ag mỹ. ¹⁵ Vãsã ra, Topẽ tỹ ã rãnrãj to: “há ti nĩ,” he jé, ã tỹ ã rãnrãj to mỹ'ãg tũ nĩ jé. Topẽ vỹ to vãsã nĩ, ã tỹ ki kanhrãn há han jé, ã tỹ vẽn kar mỹ tó há han jé gé. ¹⁶ Ũ tỹ kanhir kũ nén ã kórég tó kũ jẽmẽ sór tũg nĩ. Ũ tỹ ge ag vỹ Topẽ to kórég tãvĩ nỹtĩ. Kũ ag vỹ vỹ ag kókén ke mũ, kũ tóg ag jykre pãno pẽ han mũ. ¹⁷ Vẽn vỹ tỹ ge vỹ ãg kar kókén ke mũ, komẽr hã, ti tỹ vẽn kar kri rũm ken kũ. Vẽn kaga kórég tỹ vẽn kar kri rũm ke ri ke ti nĩ.

Ũ tỹ vẽn vỹ tỹ ge han mũ vỹ tỹ *Himeneu* nĩ gé, *Fileto* ke gé. ¹⁸ Tag ag vỹ ónón tĩ, Topẽ vỹ to. “Rĩr mãn ri ke han ãg huri, ãg tỹ *Cristo* ki gen kũ. Hã kũ ãg rĩnrĩr mãn ke tũ nĩ ha, ãg ter kar kũ, *Jesus* kãtĩg mãn kũ,” he ag tóg tĩ. Ag tỹ tag tó kũ ag tóg ãg tỹ *Jesus* to krónh ke han tĩ. Kũ ag tóg *Cristo* tovãnh mũ, ag tugrĩn.

¹⁹ ãg tỹ ĩn han kũ ãg tóg ti nũna ĩn tar han tĩ. ĩn ri ke ti nĩ, Topẽ jykre ti. Kũ tóg tũ' henh ke tũ nĩ, ãg tỹ ón kũ to vỹ mũ hã ra. ãg tỹ ti ki ge kũ nỹtĩn kũ tag vỹ ãg to rán kũ nĩ, ha mẽ: “ãg *Senhor* vỹ ti tũ ag ki kanhró nĩ,” he tóg mũ.

Kar kũ tóg: “vẽjykre pãno tovãnh kãn ra, ãjag tỹ: ĩnh *Senhor* vỹ tỹ ti nĩ, *Jesus* ti, he jé,” he mũ.

²⁰ Ha vé, ãn mág krēm kukrũ vỹ e nỹtĩ. Ũ vỹ *ouro* tỹ há nỹtĩ. Ũ vỹ *prata* tỹ há nỹtĩ. Kỹ ũ vỹ ka tỹ há nỹtĩ gé. Ũ vỹ *go'or* tỹ há nỹtĩ gé. Kukrũ há vỹ tỹ vỹjẽn né nĩ, kỹ ãn kórég vỹ tỹ vãfár né nĩ gé. ²¹ Kỹ tóg ge nĩ. Ũ tỹ kanhir kỹ nén ũ kórég tó (ka)mẽ ěn ag vỹ kukrũ kórég ri ke nỹtĩ. Hã kỹ Topẽ tóg ag mỹ: “inh rãnrãj han ra,” henh ke tũ nĩ sir. Ěg tỹ ti kórég tovãnh kãn kỹ ěg tóg kukrũ há ri ke nỹtĩ. Kỹ Topẽ tóg ěg mỹ: “inh rãnrãj han nĩ,” henh ke mũ gé sir.

²² Kyrũ ag vỹ nén ũ kar to én (ka)mẽ nỹtĩ. Ěn tovãnh kãn nĩ. Vỹjyre há hã mĩ tũg sórm nĩ. *Jesus* ki rã há han nĩ. Vẽnh kar to há nĩm nĩ. Krĩ kuprã nĩm nĩ, ũ tỹ tỹ ěg *Senhor* mré ke ag to, ãn jãnhkri ag to, vẽn kar to ke gé.

²³ Ũ ag tóg ón kỹ: “Topẽ hỹn tag tó sór mũ, ti tỹ ěn tó kỹ,” he sór tĩ. Topẽ tỹ nén tó vãnh ěn tó sór ag tóg tĩ. Tag tugrĩn jagnẽ to jũ tóg kutẽ tĩ. Hã kỹ ag mré to jykrén sór tũg nĩ. ²⁴ Ũ tỹ Topẽ mỹ rãnrãj tĩ jé vẽn kar to há nĩ. Ti tỹ kãnhmar ag to jũn kỹ tóg kórég nĩ. Ti tỹ koměr hã vỹ kỹ tóg há tĩ, ag kanhrãn jé, vẽn kar to fe há nĩn kỹ. ²⁵ Ũ tóg ti vỹ kafãn sór mũ. Ěn mỹ ã tóg vỹ há han ke mũ. Koměr hã ã tóg ag mỹ Topẽ vỹ tóh ke mũ, Topẽ tỹ ag jagãgtãn jé, ag tỹ ag jykre pãno tovãnh kỹ vẽn vỹ há hã nón mũ jé. ²⁶ Kỹ ag krĩ há nỹtĩnh mũ. Japo tũ vỹ tỹ ag nỹtĩ ja nĩgtĩ, ti tỹ ag sigse ja nĩn kỹ, ag tỹ ti rãnrãj han jé. Ag tỹ ti tovãnh kỹ Topẽ tóg ag krenkren han ke mũ. Kỹ tóg ag tỹ Japo jykre tag to vẽn nenh to ag tar han ke mũ, ěg ke gé. Kỹ tóg há tĩ.

Kurã tỹ ěgno to hã vĕjykre

¹ Ga tỹ tũ' henh ke to hã ěg tóg nĕn ũ jagy ve kãn ke mũ. Vĕnh kar tỹ vĕjykre pãno han mũ ve jé ěg tóg ke mũ. ² Ag jykre hã han sór jé ag tóg ke mũ. Nĕn ũ kar to ěn jé ag tóg ke mũ, ag riko nỹtĩ jé. Jagnĕ to vĩ kónãn jé ag tóg ke mũ. Ag panh vĩ ki hã han ke tũ ag tóg nĩ. “Kórég ti nĩ,” he jé ag tóg ke mũ, ũ tỹ ag mỹ nĕn ũ há nĩm mũ ra. Topĕ to ag é henh ke mũ gé. ³ Jagnĕ to kórég ag nỹtĩnh mũ, ag krĕ to ke gé. Jagnĕ mỹ vĕnh pãte fón ke tũ ag nĩ gé. Jagnĕ to ag ónón ke mũ. Vĕso jykrĕn ke tũ ag tóg nĩ. Ag tỹ ũ vóg kónãn kỹ tóg ag mỹ sér tĩnh mũ. Vĕjykre há kato tĕ jé ag tóg ke mũ. ⁴ Ag régre ag vatánh tá ag tóg ag to vĩ kónãn ke mũ gé. Ũ tỹ ag jykre kórég to ag vóg kónãn ke tag kamĕg ke tũ ag nĩ. Vĕso ag tóg: “vĕnh kar kãfór vỹ tỹ inh nĩ,” henh ke mũ gé. Ag tỹ Topĕ to há nỹtĩnh ke vĕ vĕ. Hã ra ag tóg ag tỹ nĕn to ěn mũ ěn hã han sór ke mũ. ⁵ Ón kỹ ag tóg Topĕ to há nỹtĩ ve nĩnh mũ, hã ra ag tóg ti jykre han sór ke tũ nĩ. Ti tỹ ěg tar han tĩ tag vỹ ag mỹ há tũ nĩnh mũ. Ũ tỹ ge ag tovãnh nĩ, vỹ.

⁶ Ag kã mũ ũ ag vỹ ĩn kar mũ mũnh mũ. Kỹ ag tóg ũn tỹtã kórég fag mré vĕmĕn sór ke mũ, ũ tỹ Topĕ vĩ mranh tĩ fag, ũn ěn (ka)mĕ fag. ⁷ Ón kỹ fag tóg vĕnh kanhrãn to tar nỹtĩnh mũ. Hã ra fag tóg vĕnh vĩ há ki kagtĩg nỹtĩ. Hã kỹ fag tóg ag tỹ fag mỹ nĕn tó mũ ki hã han mũ. ⁸ Ũ tỹ fag mré vĕmĕn mũ ěn ag vỹ Topĕ vĩ kato tĕ nỹtĩ, vĕnh vĩ há ěn kato. Vãsỹ *Janes* vỹ *Moisés* vĩ kato tĕ ja nĩgtĩ, *Jambres* ti ke gé. ěn ag ri ke ag nỹtĩ. Topĕ vĩ kato tĕ ag tóg tĩ. Ón kỹ ag tóg *Jesus* ki ge kỹ nỹtĩ ve nĩ, ag tỹ ón kỹ ti vĩ tón kỹ. ⁹ Hã

ra ũn e vỹ ag vỹ kri finh ke tũ nĩ, ha vem nĩ. Vẽnh kar vỹ ag krĩ tũ tag venh ke mũ, ha vem nĩ. *Janes* mré *Jambres* ri ke han jé ag tóg ke mũ. Vẽnh kar vỹ ag krĩ tũ ki kanhró ja nỹtĩgtĩ gé.

Ëg tỹ nén jagy vẽn h ke mũ

¹⁰ Ag jãvo ã tóg inh vỹ kri fig tĩ, *Timóteo'*. Isỹ nén han mũ ên ri ke han ã tóg tĩ. Isỹ nén ve sór mũ ên ve sór ã tóg tĩ gé. Isỹ *Jesus* ki rã ri ke han ã tóg tĩ gé. Isỹ koměr hã vỹ ri ke han ã tóg tĩ gé. Isỹ vẽn h kar to há nĩ ri ke han ã tóg tĩ gé. ¹¹ Ag tỹ inh vóg kónãn ve ja ã nĩ gé, isỹ nén ũ jagy vég tĩ ên ti. Inh vóg kónãn tỹ hẽn ri ke han ja ag tóg nĩ, *Antioquia* tá, *Icônio* tá, *Listra* tá ke gé. Ter kren pẽ han inh, tá. Hã ra ãg *Senhor* tóg ijy nĩgãn. ¹² Ha vé, ãg tỹ *Jesus Cristo* jykre mũ mũn kỹ ãg kar tóg ag tỹ ãg vóg kónãn venh ke mũ. ¹³ Ëg jãvo ũn jykre pãno ag vỹ koměr hã vỹ jykre pãno han kãn kỹ nỹtĩ, ũn ónón mũ ag ke gé. Û ag *lograr* (ke) he ag tóg tĩ, hã ra ag tóg ag *lograr* (ke) he tĩ gé, vẽn h kato.

¹⁴ Ag jãvo isỹ ã mỹ nén tó ja ên mũ tĩg nĩ, ã tỹ nén mẽ ja kar ên mũ, ã tỹ ki rã kỹ jẽ ên mũ. Isỹ ã kanhrãn ja ên to tar nĩm nĩ. Inh jykre ki kanhró ã tóg nĩ. ¹⁵ ã sĩ kã ã tóg Topẽ vỹ mẽ, ti vỹ tỹ rán kỹ nĩ ên. Ên to jãn kỹ ã tóg ki kanhrãn mũ, ãg tỹ *Jesus Cristo* ki rã tugrĩn krenkren ke mũ ti.

¹⁶ Û tỹ hẽn ri ke ag vỹ Topẽ vỹ ránrán ja nĩgtĩ. Hã ra Topẽ kuprĩg tóg ag mỹ tó ja nĩgtĩ, ag tỹ nén rán ke ti. Ti vỹ rán kỹ nĩ to ken kỹ ãg tóg vẽn h vỹ há ki kanhrãn mũ. Kỹ ãg tóg kãmén há han ke mũ gé. Ëg mỹ tóg ãg tỹ kygnẽ ja ên ven tĩ. Kỹ ãg tóg jagnẽ jyvẽn ke mũ gé. ¹⁷ Topẽ tũ vỹ tỹ ãg nỹtĩ. Ti pijé ãg tỹ kygnẽ

ve sór mũ'. Ëg tỹ kygnëg tũ nĩn kỹ ãg tóg nén ù há kar han to tar nỹtĩ. Ti tỹ tag ve sór vë, hã jé tóg ãg mỹ ti vĩ jënë ja nĩgtĩ.

4

¹ Inh kósin', sỹ ã jyvën ke vë, kỹ Topë vĩ mënň mũ, *Jesus Cristo* ti ke gé, ù tỹ vënh kar jykre tugnỹm ke mũ ên ti, ùn rĩnrĩr nỹtĩ ag jykre, ùn kãgter mũ ag jykre ke gé. Vỹn ke mãn jé tóg ke mũ. Kỹ tóg tỹ pã'i mág jënh mũ, ha vem nĩ. Ëg *Senhor* rĩnve sóg ã mỹ: ²“Topë vĩ kãmén ra,” he mũ. Kejën ag tóg mẽ sór tĩ. Kejën ag tóg mẽ sór tũ nĩgtĩ. Ge ra ag mỹ kãmén nĩ. Ag mỹ ag tỹ kygnë ja ên tòm nĩ. Ag jyvën tar han nĩ, ag tỹ mẽ jãvãnh nỹtĩn kỹ. Ag to krónh ke tũg nĩ, ag tỹ kejën *Jesus* ki rã sór jé. ³Kurã tỹ ãgno to hã ag tóg jëmë sór ke tũ pë nĩ, vënh vĩ há ti, ha vem nĩ. Kỹ ag tóg vënh vĩ kórég nón mũ sór mũ, ag tỹ nén to én mũ ên ti. Û tỹ ón kỹ ag mỹ tónh ke mũ ên vĩ vëme sér tónh ke mũ. Kỹ tóg ag mỹ sér tĩnh mũ. ⁴Vënh vĩ há jëmënh ke tũ ag nĩ. Hã ra ag tóg vënh ó hã jëmënh ke mũ sir.

⁵ Ag jãvo nén ù kar to jykrén há han nĩ. ã tỹ nén ù jagy ve kỹ kato tar nĩm nĩ. *Cristo* kãme sér ên kãmén nĩ, vënh kar mỹ. ã rãnrãj ki rĩr há han nĩ gé.

⁶ Ag hỹn kãnhmar isén ke mũ, *Jesus Cristo* tigrĩn. Hã ra tóg inh mỹ tỹ nén ù tũ nĩ. ⁷Ëg tỹ *carreira* han kỹ ãg tóg vãsãn tãvĩ han tĩ, ãg tỹ gỹjỹ he jé. Tag ri ke han inh, isỹ Topë rãnrãj han kỹ. Ti rãnrãj han kãn inh huri. Ti ki rã tovãnh ja tũ inh nĩgtĩ. ⁸ Û tỹ *carreira* ki gỹjỹ he mũ ên vĩ ka féj tỹ *coroa* gỹjỹ he tĩ. Ên ri ke nĩm jé tóg ke mũ inh mỹ, Topë ti, inh

jykre kuryj to, kurã ãn kã. Vẽnh kar mÿ ti nĩm ke mũ gé, ù tÿ ti kãtĩg jãvãnh mũ ag kar mÿ.

Paulo tÿ nén ve ja

⁹ Kur inh venh kãtĩg. ¹⁰ *Demas* vÿ isovãnh kÿ vyr. Ëprã vÿjykre han sór ti nĩ, hã kÿ tóg isovãnh kÿ *Tessalônica* ra vyr. *Crescente* vÿ *Galácia* ra vyr, kÿ *Tito* vÿ *Dalmácia* ra vyr. ¹¹ *Lucas* vÿ inhhã inh mré nĩ nĩ. *Marcos* pére kãtĩg, ti tÿ inh rãnrãj han jé. Tag to tóg tar nĩ. ¹² *Tíquico* jẽnẽ inh, ti tÿ *Éfeso* ra tũg jé. ¹³ Kÿ, ã kãtĩg kÿ inh mÿ inh *capa* ma kãtĩg. *Trôade* tá ti nĩ, *Carpo* ãn krẽm. Kÿ inh mÿ inh *livro* gé kãtĩg gé, nén ù fãr ki rán kÿ nÿtĩ ãn mré. Isÿ *livro* ãn venh hapẽ tóg tĩ.

¹⁴ *Alexandre*, ù tÿ *ferro* tÿ nén ù kar han tĩ ãn vÿ iso kórég tãvĩ nĩ. Ëg *Senhor* vÿ ti jykre kórég to ti vóg kónãn ke mũ. ¹⁵ Ti kamẽg ra. Inh vĩ kato tẽ mág han tóg.

¹⁶ Fóg tÿ pã'i vÿ inh ki inh jykre jẽmẽ pin huri. Ën kã ù tóg inh mré ve ja tũ nĩ. Isovãnh kãn ag tóg. Topẽ mÿ sóg to vĩ tĩ, ti tÿ ag mÿ vẽn pãte fón jé. ¹⁷ Ag jãvo ãg *Senhor* vÿ isar han, ti tÿ inh mré tag kã jẽn kÿ. Hã kÿ vẽn kar vÿ ti vĩ mẽ huri, isÿ ag mÿ kãmén kÿ. *Povo* kar ag vÿ hur mẽ kãn. Kÿ ãg *Senhor* tóg ijy nĩgãn, ag tÿ mĩg mÿ inh fón tũ nĩ jé. ¹⁸ Ijy nĩgãn mãn jé tóg ke mũ gé, Nén-Kórég tÿ isÿ hẽ ri ke tũ nĩ jé. Inh ki tóg rĩr há han ke mũ, sÿ kanhkã ra tĩg há han jé, ti nĩgja ra. Ti hã mÿ ãg vĩ há han ke mũ'. Kÿ tóg tũ' henh ke tũ nĩ. Hã vẽ.

¹⁹ *Priscila* fi mré fi mén tÿ *Áquila* mĩ sóg ãkrég tĩ, *Onesíforo* mré ke fag mĩ ke gé. ²⁰ *Erasto* vÿ *Corinto*

tá nĩ nĩ. Jãvo *Trófimo* tóg *Mileto* tá kaga nỹ ja nĩ, isỹ tá kãtĩ mũn kã.

²¹ Kur kãtĩg mẽ han, kusa tá krỹg tũg ki. *Êubulo* vỹ ã mĩ ěkrég tĩ, *Prudente* ti ke gé, *Lino* ti ke gé, *Cláudia* fi ke gé, ěg régre kar ag mré hã.

²² Ěg *Senhor* mỹ sóg to vỹ tĩ, ti tỹ ã tar han jé, ti tỹ ãjag kar tar han jé gé.

Hã vē.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

PDF generated using Haiola and XeLaTeX on 11 Nov 2022 from source files
dated 26 Mar 2022
16af52c8-0e45-5e91-b36c-cd314d36d7fc